

# Next Gen Surses – inscunter per giuvenils 16+



Thomas Eigensatz (san.) ed Adrian Ballat ainten lour video sen Youtube per carmalar igls giuvenils agl inscunter dalla «Next Gen» 16+.



En project tg'è gio reuschia cun participar giuvenils è igl pumtrack a Savognin.

Fotos MAD

Sandra Balzer/FMR

**La cumischung per la participaziun da giuvenils Surses anveida: «Next Gen Surses» – en inscunter per la generaziun 16+ tg'ò li per l'amprema geda proxim venderde. Cugl inscunter ins less antrar an contact cun ena generaziun tg'è betg simpla da contanscher. Ossa on els la pussebladad d'exprimer basigns, giaveischs ed ideias.**

Hallo Next Gen – «Nous tschantessan gugent ansemen cun vusoters – la Next Gen 16+ – per vurdar schi pudessans puspe realisar ensatge scu per exaimpel chel cool project cò», deian Thomas Eigensatz ed Adrian Ballat ainten lour video sen Youtube, mussond segl pumtrack Savognin tgi sa catta davos els. Tots dus fon part alla cumischung per la participaziun da giuvenils digl cumegn da Surses. E cun lour video lessan els carmalar enqual giuvenil pigl inscunter «Next Gen Surses».

## «Ena gruppa d'impurtanza»

«Depona las tias visiuns, igl ties meini, las tias ideias», screiva la cumischung ainten la sia invitaziun pigl inscunter cun la generaziun 16+ tg'ò li proxim venderde a Savognin. Da participar giuvenils e promover lour dretgs è egnà dallas maseiras or digl maletg directiv digl cumegn da Surses. «La generaziun 16+ è ena generaziun tg'ins perda or digl igl ed è greva da contanscher: els na von betg anc a cumegn, èn pero er betg ple aint igl process da scola», dei Adrian Ballat ed agiunta: «Chegl è ena gruppa d'impurtanza. Ossa igls anvidainsa, tadlagn lour basigns. Anc èn els

collias cun la val. Sch'els on projects ainten la val stattigl forsà cò er an futur. Nous igls lagn pero er dumandar, tge tg'è basignevel, per tg'els seian forsà er cun 30 u 40 onns anc a cò.»

Ma, tgi è ansomma la «Next Gen»? Giuvenils tranter 16 e 20, ni tranter 16 e 30? «Chegl vaina laschea avert aposta. Chels tgi on interess ed èn mutivos, duessan neir. Tot tenor ègl forsà alloura da piglier dapart, nous lagn propi er tgi chels da 16+ possan s'exprimer, vegian ena plattafurma.»

## Organisar ena reit da comunicaziun

Exprimer visiuns, ideias, basigns – chegl è igl intent digl inscunter. E scu vogl siva anavant cun tot chellas ideias e chels giaveischs? «Chegl na duess betg simplamaintg esser en concert sen giaveisch. Igl pumtrack noua tgi p.ex. Livio Cadotsch è s'angaschea è en bung exaimpel. Schi els èn pronts dad esser activs e luvrar, alloura ins amprova da sustignier e realisar. Pero nous lagn er betg far ampurmischungs falladas», dei Adrian Ballat.

Gist perchegl tg'ins contanscha strousch chella generaziun seia egnà dallas fegnameiras dad organisar ena reit da comunicaziun per colaborar an futur, seia chegl sur canals electronics scu e-mail u WhatsApp, ni cun inscunters. «Chegl laschaisa anc avert», manegia Adrian Ballat.

## Infurmo sur Youtube, WhatsApp ed Instagram

Ena tala invitaziun an nom digl cumegn è ena premiera. Adrian Ballat sa regorda pero ad en tal inscunter noua tgi el sez è sa participo. «Perchegl sunga ossa forsà cò noua tg'ia sung. Anim – en project per promover ideias ainten la val – è er anvido eneda la next gen. Nous

vagn dei già contact tots ansemen, me persunalmaintg ò chegl mutivo per chella lavour.» Per venderde seira spera Adrian Ballat da beneventar tranter 20 e 30 giuvenils. I na seia betg simpel d'ansomma contanscher chella generaziun per infurmar davart igl inscunter. En tgit sen Youtube tradescha: igl video ò aglmanc 80 clics. Pinavant ins vegia infurmo sur medias socialas e las giuventetas.

E cun tge propostas vign la cumischung, ègl angal en tadlar, ni ins ò er da lezza vart ideias concretas? «Nous vagn en'ideia concreta tgi preschentagn, lagn pero betg sfurzar els. I sa tracta d'en project dalla Gruppa svizra per las regiuns da muntogna SAB, spezialmaintg per la generaziun 16+. Forsa tgi surpiglessan en tant responsablidad ainten la lavour da giuvenils.»

Da vart digls giuvenils faschess betg surstar, sch'igl basigns d'en li per eir an sorteida fiss egn digls temas, chegl tgi para d'esser en manco per chella generaziun ainten la val. «Chegl è gio siva dad onns en tema e fiss per franc interessant. Chegl è er egn digls muteivs pertge tgi stattan betg se cò. Igl cumegn so an chel gro forsà betg far ena massa, pero schi els s'angaschan en po, alloura dattigl per franc pussebladads.»

*Igl inscunter «Next Gen Surses» ò li venderde, igls 24 da mars 2023 dallas 19.30-21.00 aint igl BARterre a Savognin.*

*Igl video sen Youtube dattigl sot chel code qr:*

